

萬有文庫

第二集七百種

王雲五主編

洪北江詩文集

(三)

洪亮吉撰

商務印書館發行

洪北江詩文集

(三)

洪亮吉撰

國學基本叢書

予幼時讀荀卿子修身篇曰。其爲人也。多暇日者。其出人不遠矣。予嘗執此以觀當世聰明才力之士。其有所成者。皆勤而不暇者也。洪君稚存。幼孤。得母夫人訓。自力於學。年未二十。以貧客四方。迄今又二十年。傭書食力之外。卽鍵戶誦述。研精覃思。過其外者。如無人焉。于經深春秋。所著有春秋三傳古義。左傳詁二書。於史精地理。所著有三國東晉十六國疆域三志。刊史記以下四史謬誤十二卷。又以宋李繼遷傳國逾百年。而事蹟闕略。復成西夏國志十六卷。于六書通諧聲。所著有漢魏晉四卷。外爲詩至二千首。文及雜著數百篇。而所修府州縣志。及爲幕府牋奏。不與焉。洪君吾不能諒其所至。庶幾可爲無暇日者矣。君善於漢魏六朝之文。每一篇出。世爭傳之。以倦於鈔寫。茲友人爲刊其乙集四卷。以予素嗜其文。因請序于予。予前嘗欲錄亡友邵編修荀慈。胡徵君稚威。暨君數人之作。合爲一集。忽忽未暇也。今玉芝堂集。及君此刻。並已刊成。老念藉以稍慰。至其文之淵雅。氣質之深厚。世皆能知之。予不贅述云。

乾隆五十一年歲在丙午花朝日錢塘袁枚序

卷施閣文乙集卷第一

連珠三十二首

蓋聞十日並出。不若陽烏之再中。百川疾流。不若靈河之東注。是以日中見斗。燭物之理自存。山下出泉。朝宗之心已著。

蓋聞以近槩遠。中無豪釐。舉後定前。失者什伍。是以宋國五石。忽憶前身爲星。泰山一雲。安知異日作雨。蓋聞片壤之安。羌蜚逞其智。一葉之庇。螻蟻仰其陰。是以吞巨舟者。必思江海爲家。戴尺木者。乃以風雲爲蔭。

蓋聞威劫于外。則不非其非。智昏于中。則非類亦類。是以指鹿作馬者。刑餘之臣。以驚當鳧者。刀筆之吏。蓋聞造物之儲。或留而不用。聖王之制。每過于所防。是以一世之衆。飲不竭河。而供之以江海。萬夫之勇。超不越丈。而限之以城隍。

蓋聞塵揚席上。灰然鼎間。飛揚雖同。涼燠以異。是以灌夫罵坐。難止膝席之賓。次公酒狂。羣驚仰屋之讞。蓋聞力竭智窮。則愚者必收拙效。識大見遠。則感者不嫌過計。是以塵當揚海。故冤禽之志不衰。杵可倚天。則杞國之憂匪細。

蓋聞勢盛復持以奢。必無以處時過。日午又益以火。必無以禦夜寒。是以朱門矜土木之工。不能以片瓦覆末世。祖宗饌飲食之譜。不能以一飽貽子孫。

蓋聞岐塗萬千。不當殉之以跬步。今古億態。不當處之以思議。是以立志可以入世。故萬物漂動。而金石不流。無心可以貞運。故七曜改色。而風雲不壞。

蓋聞器適于用。貴賤之形泯。材值其候。小大之勢易。是以二曜不可鑑影。慙于半規之銅。五嶽不可厲刃。遜于一尺之錯。

蓋聞分有可冀。則谿壑難盈。物非所勝。則庸愚念息。是以鷹隼卽驚。不求虎豹之腥。漁人雖貪。非冀蛟龍之獲。

蓋聞獨心雖智。謀事不臧。隻拳雖勇。遇敵必債。是以明堂九仞。承之以百柱則安。迅流千里。障之以一黃必決。

蓋聞邪正殊者。必無合志之言。得失明者。不爲無益之事。是以爲盜之室。寧致禱于黔婁。習佞之夫。不交魂于汲直。

蓋聞巧匠制物。成毀難定。明鑑過影。曲直未分。是以漢壁千鎰。不能止亞父之碎。秦鏡百具。無由燭趙高之佞。

蓋聞善之與惡。氣必相感。利之與害。勢有各驚。是以栽棘成林。鴟鵂樂其安宅。平衢似砥。狐鼠以爲畏塗。蓋聞思匿其短者。以猜疾爲肺腑。冀遂其私者。求黨類爲膠漆。是以無鹽入室。視明燭而必讐。瘦者過市。見曲瓢而自慰。

蓋聞五簋登筵。旨者早盡。千葩攢樹。豔者先摘。是以終童夙慧。不臻厭次之年。龔生竟夭。乃致彭城之涕。蓋聞誓苦而不信者。五嫁之妻。力勤而不錄者。屢逃之僕。是以漆室之行。非藉于指天。晉文之臣。不煩于投玉。

蓋聞非神無以燭事。而或有所窮。非勢無以馭物。而或有所遏。是以珠玉沒水。日月不能垂其照。魍魎遁虛。雷霆不能施其烈。

蓋聞節有至奇。視其所發。行有甚烈。必貴得宜。是以證羊之直。用于子而不慙。嚴父抱柱之信。移于女而必爲貞姬。

蓋聞乾煦坤和。矜垂于微末。日變月蝕。兆起于纖豪。是以一婦至冤。東海有赤田之旱。匹士銜憤。吳門成白馬之濤。

蓋聞能有所盡。智有所窮。安之者聖。強之者愚。是以六合之外。不知仲尼。故聖于鄒衍。五經之表。不議孟子。亦賢于莊周。

蓋聞淒思一入。則萬態助悲。華心旣揚。則百族盡煦。是以朱戶累累。明月至而益輝。蓬關蕭蕭。寒風來而若怒。

蓋聞飛霰于夏。時苦救而天災成。舉耒于朝。民勞同而主事廢。是以馭一世者。以不勞成勞。調四氣者。以不德爲德。

蓋聞秉萬族之秀。則物遜乎人。成一節之奇。則人希乎物。是以充廉士之節。必爲蚓而爲魚。言君子之化。或成援而成鶴。

蓋聞能有獨擅。理不得均。器有偏饒。勢無能共。是以田竇之家。以千金而易一賦。枚馬之室。用萬言而貸半鐘。

蓋聞美醜雜陳。要于取法。剛柔性定。貴擇所從。是以下士心競。視流水而可平。懦夫氣衰。見高峯而亦竦。蓋聞嚴霜被澤。嘉草同萎。野火燎原。仁獸亦燼。是以君子業業。不垂禍福之言。小人皇皇。乃著災祥之論。蓋聞理無所宜。必求實效。用各有適。無貴虛名。是以琴瑟雖雅。非能引之論心。鸞雀甚馴。不可委之守藏。蓋聞炫寶于門。伺者百盜。露奇于世。忌者萬夫。是以尺璧在抱。必加再襲之衣。積金之家。恆著重局之戶。蓋聞拔木之獸。天不能不生。而有山以相域。惑川之蟲。地不能不載。而有墟以相容。是以魚假之足。則江海之塗必塞。虎傳之翼。則城郭之民已空。

蓋聞貴不若賤。以計得失。智不若愚。以識趨辟。是以萬衆局縮。蹈白刃者。烈士。一世震懾。犯龍鱗者。匹士。淳化縣志敍錄十八首

予自歲辛丑入關。撰定此間方志者三。同州之澄城。邠州之淳化。長武。是也。關中地大物博。又諸紀錄。自漢三輔黃圖以降。暨唐韋述關中記。宋宋敏求長安志。程大昌雍勝略等。咸可準繩。而府州縣志。可采者蓋寡。蓋明代諸賢。事非師古。苟爲簡略。卽故城舊瀆。皆棄之如遺。今所盛傳武功朝邑二志。不知者以爲賢過古人。非篤論也。予爲此志。一準昔賢。非苟求立異。實欲藉茲成規。示諸來禩。凡爲記八。爲簿二。爲志五。爲略三。共三十卷。凡五閱月而成。其敍曰。

古縣今縣。新城故城。黎園舊鎮。流金昔鄉。咸攬川陸。附之橋梁。倣晉朱育會稽土地記等。述土地第一。史言甘泉。傳志石門。冶谷引涇。荆山導汧。灌漑之利。被于無邊。倣齊劉澄宋初山川古今記等。述山川第二。

史家遺法。首記大事。三千餘年。如掌可指。倣漢司馬遷等大事記。述大事第三。古云。吉行日三十里。披諸圖經。式其遺意。倣隋西域道理記等。述道理第四。

嬴秦築宮。遷五萬家。越漢始元。徙民三輔。良規旣失。志丁略戶。稽其盈虛。逮今淳化。倣宋元康六年戶口簿記等。述戶口第五。

惟民之俗。百里不同。爰志士女。逮農工商。倣晉周處風土記等。述風土第六。

雍州積高。神明之區。雲陽甘泉。又帝所居。下暨小鬼。靈而不誣。倣齊祠廟記等。述祠廟第七。

世遠莫追。金天有陵。青鳥之冢。圖書可徵。仿宋李彤聖賢冢墓記等。述冢墓第八。

秦皇漢武。築宮祈仙。洪崖弩陸。增城在焉。百世飄忽。羊牛下來。下士奏賦。通天之臺。倣晉洛陽宮殿簿等。述宮殿第九。

征輸之薄。前代所無。農桑絲粟。以迄市租。冊籍可稽。職于胥徒。倣宋李常元祐會計錄等。述會計第十。

泮宮居前。叢祠列後。英英羣賢。光我俎豆。倣宋崇寧學校新法志等。述學校第十一。

才餘于官。不廢嘯歌。此如傳舍。所閱既多。倣宋無名氏衙署志等。述衙署第十二。

白公鄭國。民歌至今。王陽作令。亦有遺音。采其遺蹟。以代吏箴。倣唐杜佑通典職官志等。述職官第十三。

世需多士。士貴通經。茂才異等。咸貢王庭。倣宋崔氏登科記等。述登科第十四。

廣陵列士。會稽先賢。列女後傳。撰于顏原。邑縱叢爾。無微不傳。倣晉常璩華陽國士女志等。述士女第十五。

金石之文。古稱不朽。彙茲豐碑。庶傳于後。倣宋鄭樵通志金石略等。述金石第十六。

淵雲之作。冠于簡端。國師峨峨。亦賦甘泉。後有多士。庶幾前賢。倣漢劉向七略詞賦略等。述詞賦第十七。

凡志方隅。必推今昔。稽乎古圖。準以今尺。惟茲一編。咸述舊聞。勿淆其次。以俟後人。倣常璩華陽國志序錄等述序錄第十八。

終南山圭峰寺銘

若夫一峰之上。支公疏其小池。百尺之餘。祇園森其列柏。高瞻遊鱗。類矚飛鳥。南則層峰接天。意凌星斗。北則青氣屬地。靡見寰宇。陰厓草枯。積雪尙白。煦谷氣暖。巖花已紅。怖鴿一隊。枯僧兩三。翳綠蘿而居。穿白雲而出。相與並肩層巖。凝睇初日。金碧萬端。華心易其素念。霞采億狀。茅齋成夫麗矚。蓋已響沈音外。思舉雲表者焉。適有奇石。陵乎坐次。爰爲之銘曰。

空水易曙。白雲知春。十步五步。花香送人。蘿谷尙暗。松軒已辰。僧疑入定。雀乍棲真。鐘疎出寺。鐙暗披帷。琴牀月落。蝶帳風開。草名躑躅。花號徘徊。虬枝競挽。馬首頻回。塔看倚杵。峰真秉圭。

終南山高觀谷銘

鄠縣東南行三十里。有高觀潭。谷水出焉。五里未及。驚霆接天。百步尙懸。飛瀑搏頰。洵人外之奇觀。霞表之靈境也。若其危厓半傾。若斜景之入海。巨石自轉。同高穹之隕星。曾不踰時。已抵絕壑。雖激電之閃戶。飛矢之出林。不是過也。春雨旣積。山空自鳴。萬壑競乎一門。百丈限之盈尺。此則山澤氣阻。陰陽與之回皇。風雲色變。星辰因而匿采者矣。余尋幽匪遙。好奇斯過。遵彼磐石。薄焉觀之。齋心旣空。盈耳有悟。遂爲

之銘曰。

鯨波乍湧。龍氣猶腥。高欲切漢。光疑浴星。頽峰作檻。劈石成局。出寶始白。回瀾乃青。流金迄石。衝谷注壤。海者輸靈。坻隤遜響。遵巖覓電。頽壑尋雷。天地黯慘。風雲蔽虧。無人獨往。有月飛來。

漢麒麟閣功臣頌并序

麒麟閣者。漢宮閣疏名云。蕭何造。張晏曰。武帝獲麒麟時作此。因圖畫其象于閣。遂以爲名。以予推之。閣蓋構始于文。終錫名于武帝。漢書武帝紀。元狩元年冬十月。行幸雍。祠五畤。獲白麟。至太始二年。始下詔更黃金爲麟趾。以協瑞應。是時漢興已一百十年。日月麗于中天。文武集于亨衢。時博陸侯霍。已入禁闥。富平侯安世。已爲尙書令。光祿大夫。營平侯充國。龍頤侯增。均已爲郎。丞相博陽侯吉。爲廷尉監。典屬國武。已使匈奴五年。按春秋感精符曰。德及幽隱。不肖斥退。賢者在位。則麒麟至。是知飲泉食露之符。爲連茹拔茅之兆矣。至宣帝甘露三年。始圖畫其人于麒麟閣。法其形貌。署其官爵姓名。惟霍光不名。曰大司馬大將軍博陸侯姓霍氏。次曰衛將軍富平侯張安世。次曰車騎將軍龍頤侯韓增。次曰後將軍營平侯趙充國。次曰丞相高平侯魏相。次曰丞相博陽侯丙吉。次曰御史大夫建平侯杜延年。次曰宗正陽城侯劉德。次曰少府梁丘賀。次曰太子太傅蕭望之。次曰典屬國蘇武。凡十一人。偉矣哉。定策則博陸。相業則丙魏。名臣則杜張。宗賢則陽城。儒雅則梁蕭。武功則韓趙。使節則子卿。親賢並升。文武備列。昔陸機爲漢

高祖功臣頌。袁宏爲三國名臣序贊。歌詠功德。至數十人。然徵其美備。考其績效。均若有不及焉。蓋世遭隆平。士逢豁達之主。得明目殿陛。振聲巖廊。挾一策入石渠。請長纓度沙幕。居禁闥而不遺。在窮巷而亦顯。中廐之馬。旣擢日磳。上林之羊。亦升卜式。牧豕極于上相。販駿登乎九列。亦可謂立賢無方。用人不求備者焉。此數人者。向使生秦項之世。值吳蜀之主。上則刀筆趨走。自擬于鴛鴦。下則筆門甕牖。發聲于蚓。竅安能鼓垂天之翼。絕塵而逞其驥足哉。此門穀所以垂涕而言曰。知臣莫若君。樂羊所以捧篋而泣曰。非臣之力。君之功也。豈不美哉。夫以光武之明德。悼歎于龐萌。元皇之風烈。受譏于張禹。則知人則哲。從古難之。遂使孤臣萬里。餘搶地之呼。下士百世。奏通天之牘。自非英斷卓識。鴻業大烈。曷臻于斯。暇日慕其風尚。不揣謏陋。爰各爲之頌。亦以存景風之思。爲來禋之式云爾。

漢至五世。云惟百年。德盛化洽。麒麟至焉。按古圖書。讖緯之篇。來此上瑞。登庸大賢。皇皇大賢。神明攸贊。桓桓博陸。票騎同產。旣媿阿衡。亦參姬旦。負展畢世。放桐不反。大節旣植。生知不學。英辟握手。幼君入抱。三踐帝席。兩握國寶。勳存畫室。忠勒高廟。矯矯杜陵。留侯共族。兄罹蠶室。父治鼠獄。勤勞旣著。肺附是屬。身膺上裘。世執圭玉。國鈞旣秉。民譽四洽。雅善魏丙。不友田甲。英英漢廷。口議八法。彬彬儒林。腹置三篋。侯有龍頷。世爲虎臣。千戶旣益。萬騎出屯。雖有令德。亦鑿凶門。時惟鷹揚。起于巫蠱。功參上宰。事歷三主。言求偉伐。試覽勳簿。震震烈烈。篤生營平。方叔召虎。來于西京。有漢中葉。西羌不寧。黃髮鮐背。爰求將兵。

神爵之元。天子推轂。旄頭初出。羽騎始肅。光光將軍。遠夷斯服。將偃五兵。講求六轂。高平對策。進由儒者。頗厲威嚴。庶資嬋雅。建策堂陛。馳傳天下。觀漢故事。講求便宜。外戚附奏。列侯詳議。號通犧畫。乃學計倪。征和之間。八蜚鼎沸。隆準寓獄。長楊望氣。中使星馳。圓扉夜閉。婉孌哲人。實司郡邸。中興之相。陰德以侯。既主禮讓。實惟仁柔。赫赫公府。恢恢皇猷。不解案吏。惟知問牛。次公簡簡。亦明法律。才平獄訟。復議鹽鐵。持躬以整。應機以疾。元平正始。實惟憂虞。職典方藥。功參立儲。幾陷許止。乃比朱虛。隆漢之規。親賢並用。城陽濟北。厥後誰踵。盤盤宗英。名德見重。甘泉召對。未央列議。軺車七乘。汗血千里。尙冠以興。海昏用廢。六經至漢。蔚然羣師。琅邪受卦。兼擅易旗。絃服入廟。旄頭墮泥。儒術旣隆。卿階不替。宏羊駢駢。比茲心計。五鹿嶽嶽。慙其經義。東海蕭生。起于白屋。犯主顏色。責相吐握。吏持匈匈。友哂碌碌。終登貳宰。入授禮服。承明高議。聲振殿瓦。英英及門。槐里蓋寡。旣趣飲鳩。遂請斬馬。賢傳旣決。佞臣斯忤。子卿少卿。並寄絕域。一踞胡服。一持漢節。義重于生。冤銜至沒。陵惟霑衿。武乃刺血。罽帳奏樂。穹廬雨霜。飛雁不下。牧羣旁皇。掘根鼠穴。書帛雁足。方困羝乳。乃畫麟閣。肅矣西京。炳靈羣公。前後萬古。茲惟日中。允文允武。立德立功。平視九駁。高參五龍。昔歲魯郊。宣尼所歎。今茲隴首。匡鼎以贊。傑閣雖朽。崇勳尙爛。望景中隆。流芬灞漭。昌國君樂毅頌。

羣兆大澤。伊緣空桑。猗惟若人。厥聲亦英。生後十世。不直禹湯。舉足欲出。九野虎狼。虎狼之羣。鳴鳳萬仞。

回鹘秦楚斂翼三晉。攬茲德輝。擇主以進。功殊蓋世。恩亦逾分。三光旣赫。九鼎亦震。時方忻亂。天未祚德。間騰卽墨。功墮騎劫。七十二城。悉傳以翼。英英鄒彥。曾不入燕。翩然來斯。惟茲一賢。封崇昌國。義感沒世。身雖居趙。引領北視。銜恩而息。戴德而死。頌于千年。以感國士。

萬壽無疆頌并序 代太常卿倪承寬作

臣某言。臣伏讀皇帝陛下正月元日詔書。以乾隆四十五年。值七旬萬壽聖節。敬法皇祖聖祖仁皇帝成典。布大澤于天下。猗與休哉。詔書所列。自祀五嶽四瀆。以迄肆赦。凡二十條。臣竊見皇上自御宇以來。四十有五年。國家承平一百三十七年之久。天下戶一千萬。口一萬萬。內自羣工卿士。師尹百辟。外暨億兆臣妾。遼遼曠遠。殊形而共慶。異聲而同和。喁喁焉。忭忭焉。蓋延頸接跡。冀德倖澤。自九天之下。迄九地之上。六合之內。以薄于六合之外。然皇上猶持盈戒成。蘊謙育和。自乾隆三十五年六旬慶節。至此又越十載。始沛然順輿情。頒大詔。以妥神祈。以答中外。而又繁文縟節。槩敕勿事。面戒有司。訓諭諄諄。逮于下者。無不隆。受于天者。靡敢侈。至矣哉。法祖之烈。敬天之心。勤民惠下之誠。盛德勿德。雖休勿休之念。靡不繪丹戾。縣黼坐降玉陛。歷金門。而被于凡有知識者矣。夫含生之類。靡一物不得其所。至聖矣。化之所被。不心而應。不踵而至。至神矣。禮樂之盛。藻地縟天。至文矣。聲威所被。窮舟阻輪。跨嶽越海。至武矣。謨文定武。廣聖極神。涵億兆之和。而受繁祉之錫。至壽矣。臣不敏。侍從數十年。自翰林洊登卿貳。親見皇上展禮嵩

高告功岱宗。歷太行。登會稽。蹕興京。謁闕里。循河隄。築海防。每所省幸。施澤輒數百萬。又親見皇上平回部。再平金川。西南諸酋。稽顙歸化。難可畢數。拓地三萬里。迄乎日月斗所出入。又開四庫館。自周秦以來。經史子集。靡不集其大成。兢兢業業。若彼巍巍蕩蕩。若此臣竊見詩之序曰。時邁曰般。言天子巡守告祭柴望。及祀四嶽河海也。曰魚麗曰蓼蕭。言天子功成治定。制禮作樂。澤及四遠也。曰天保。言臣能歸美。以報其上也。故曰降爾遐福。曰受天百祿。言天與天子以廣遠之福。而天子克荷之也。又曰貽爾多福。言神又能目多福貽天子也。故天不吝天子以日月之壽。則百祿之應不章。五嶽四瀆。羣祈百神。不佑天子以億萬之齡。則多福之徵不顯。羣工卿士。內外百辟。不祈天子以覆載之永。則歸美之誠不敷。琬琰所鐫。金石所述。五三六經之所遺。不可誣矣。臣今者又披瑞應之圖。集靈寶之記。以合今之所見。則狺狺踴踴。與化低昂。笑夸世之主。而待乎麟鳳。何生不育。元氣滲漉。何曩葉之君。而炫夫嘉穀。嶄嶄者。岱爲宗。曷爲濯露雨。瑞日月。而待升中。洵洵者。河以鴻。曷爲束魚鼈。恬駭浪。而就成功。羣蒙首首。于以戴斗。惟生之厚。庶祝天子之壽。橫目顛顛。而惟視天。何歡而抃。云慶天子之年。天人之應協矣。神人之理昭矣。兆姓之符著矣。凡此數十條。臣每見漢唐宋中。葉諸盛辟。得其一事。無不加尊號。膺玉冊。鋪張鴻名。增益盛算。而皇上獨一切勿事。惟民生治術爲兢兢。蓋于于焉翼翼焉。又將超其識于八代之上。藐然而繼五位三紀之盛軌也。臣不敏。素以文字受特達之知。況親覩偉烈。首沐至化。又恭值敷天之休。率土之慶。得預百辟之末。

而奉萬年之觴。且雅頌之蹟。彰彰若彼。而臣獨不克繼軌前哲。導揚盛美。臣實慙焉。輒不自諒。謹獻萬壽無疆之頌八章。頌曰。

皇帝御宇四十五年。惟天眷帝。惟帝法天。法天伊何。敬以率先。德盛化洽。持之以謙。謙惟召和。敬以集福。儷乎天位。永此帝籙。右第一章

五緯既曜。九軫聿張。鬱鬱紫府。肇乎文章。惟茲文章。釐以甲乙。苞賢蘊聖。昭典鑄則。甲觀辰啓。乙帳夜陳。炳炳麟麟。法天之文。右第二章

惟天有鉞。鉞亦南指。惟天有弓。弓實西矢。蠢惟不靖。匪西而南。命彼六師。撻伐以三。爰俘渠率。爰拓疆土。震震靈靈。憲天之武。右第三章

收敗穆清。厥兆誰見。三百六度。知行之健。淵淵帝躬。八賁是奠。四十五載。省方亦徧。東西既歷。南朔聿臻。惠下以實。則天以勤。右第四章

鴻流之貫。揚豫窅青。視天有漢。爲地之經。惟湮隄防。下土以疾。展茲宸晝。繼彼曩烈。赫赫六飛。遵海而觀。惟帝東邁。象天左旋。右第五章

無云巍巍。天亦降威。曾不終日。雷霆已回。惟皇鑒之。以詔司士。捐瑕濯釁。一與更始。方網既解。圓斗益明。凡百肆赦。助天省刑。右第六章